



ROK I SANKCIJA (...ili zašto kod nas mrkva bez štapa ne funkcioniра)

Za razliku od većine građana ove zemlje koji pomno prate trakavicu ko će s kim i na kom nivou (formirati vlast, naravno), mene iskreno najviše kopka sadržaj konkretnog programa za provedbu nečega što se u javnosti zove Britansko-njemačka inicijativa, novi pristup Evropske unije prema BiH. Neki su rekli da je to nova, a neki opet tvrde posljednja šansa za ubrzanje puta naše zemlje u Evropsku uniju.

Okvir inicijative je poznat, ekonomske i socijalne reforme, vladavina prava, funkcionalnija država, otprilike...

Ono što ne znamo i što jedva čekam i čemu se nadam jeste program šta, kako, ko i do kada mora uraditi. I silno priželjkujem da se u ovom popisu nađu i sankcije za one koji svoj posao ne urade. Jer (znam nas) čim se objelodani sadržaja tog dokumenta ili programa, zvaničnici će se potruditi i sate i dane utrošiti objašnjavajući zašto se pojedine obaveze ne mogu ispuniti (a da se pri tome i ne potrupe barem pokušati nešto uraditi).

I da ne bismo opet izgubili godine (sjetiti se Sejdić-Finci, molim) na isprazna objašnjavanja zašto to ne možemo uraditi iz čisto praktičnih razloga (da i ovaj program ne završi kao mrtvo slovo na papiru, potpisano pride), rokove i sankcije obavezno treba predvidjeti.

Opet znajući nas, predlažem da sankcije budu isključivo materijalne prirode. Na način da se čelniku (čelnicima) institucije nadležne za provedbu određene reforme lijepo odbije od plaće za svaki mjesec prekoračenja roka (i to tako da odbitak bude veći iz mjeseca u mjesec). Jer, ako ćemo iskreno, jedino što stvarno boli nas ovakve kakvi jesmo, jeste finansijska sankcija po privatnim džepovima.

Pokušala je međunarodna zajednica sa različitim sankcijama koje su išle i do smjena odgovornih. No, domaći političari su smjene uvijek iskorištavali u vlastitu korist (jer eto u interesu države??? i naroda??? nisu htjeli prihvatiti zakon, donijeti odluku i sl. i umjesto da ih javnost percipira neradnicima i krivcima, preko noći su postajali nacionalni junaci – sic...)

Možda će zvučati preoštro, ali valjda smo se svi uvjerali da mrkva (u ovom slučaju novi pristup EU prema BiH) bez štapa kod nas jednostavno ne funkcioniра. **B**

Aida Delić,
glavna i odgovorna urednica